

OLA

PULETINI A'OGA



4 TESEMA 2023 ~ Lomiga 19 ~ Upega Tafailagi: www.ola888.com ~ Telefoni: 0210364322 ~ Tuatusi: ola.niupac@gmail.com ~ evaleon.books@gmail.com ~ NIUPAC Publication

Fa'aaliga

Mo le mamalu tele o le 'aufaitau, tatou te toe fetapa'i i la tatou Lomiga 1 o le 2024 i le masina o Aperila 2024, pe a aulia atu i ai i le agalelei o le Tapa'au Sili. Ae tatou te fesoota'i lava e ala i le Ola Puletini Facebook ma le Upega Tafailagi www.ola888.com. E avanoa pea fesoota'iga i le tatou Paso 19 se'ia aulia le 23 o Tesema. Pu'e se ata o le itulau o au tali ma lafo mai i le tuatusi saili.niupac@gmail.com. Faafetai.



I TULAGAVAE O LE TAMĀ: Le tama'ita'i o Marysulesa Matavai Tautunu, Dux a le Kolisi o Leifiifi 2023. E fai ia ma sui o alii ma tama'ita'i na ausia lenei faailoga ausigata i lenei tausaga. I le ata ma lona tamā Ta'iao Dr Matavai faapea ona totino sa auai i le laugatogi. O le miti a Marysulesa, e fia avea ma se tagata su'esu'e i tala'eli a Samoa. **Ata—Samoa Observer.**

Avea pea le aganuu a Samoa ma sootaga mau taua'oga

O LOO AVEA PEA LE AGANUU A SAMOA ma sootaga malosia taua'oga, i malaga a'oga mai fafo, e aofia ai ni iunivesite lauiloa, e pei ona malotia ai le Laumua i le na a se 'aumalaga mai Ausetalia, i le vaiaso na se'i tuana'i.

E 84 le aofa'i o le 'aumalaga, aofia ai faia'oga ma tama ma teine a'oga. Mai le iunivesite o Monash i Ausetalia, e o mai ai, o se tasi iunivesite fa'aaloogia a lea atunuu.

O le sini o le malaga e fia manino atili i a'afiaga o tagata e mafua i le suiga o le tau i nei aso. Latou te fia iloa fo'i ni fofo faa-Samoa i lenei lu'itau.

O le filifiliga a le pule faatonu o le Nofoga o Mataupu Tau Samoa, Ta'iao Matiu Dr Matavai Tautunu, e ave le malaga i se nuu Samoa, e fesoota'i tonu i le tofamanino a Samoa i le nuu o le falea'oga muamua o le tagata Samoa, ae faapea fo'i se tagata ese e asia ona laufanua. O le tali lea a Samoa i le tele o faafitauli, o le nuu i ona pulega lelei ma maopoopo, le auala e mafai ai ona faatino ni tali malolosi i lu'itau e pei o le suiga o le tau.

I le afoaga o Samusu na faamalo'ulo'u atu ai le solo a ni pasi se lima, na tālia mai le malaga i le alii taeao ma le usu faaaloalo a gima ma le



E lua vaiaso o le malaga e aofia ai nisi o motu o le Pasefika i se poroketi e taula'i i aafiaga e mafua i le tau

faleupolu. Ma amata ai le a'oga mo le malaga i le tu a Samoa pe a faafeiloa'i a latou malo.

A o fealoaloa'i itu e lua i le tapua'iga o le 'ava sa faamatala foi i le Gagana Peretania le uiga o lenei aganuu e alii faia'oga, mo le silafia a le 'aumalaga. Ona faaii lea i se taligasua māmā ma fa'aaau ai i Lalomanu mo se tafaoga.

O Taufua i Lalomanu o se molimau i le tali faalenuu i se mala faanatura, e pei ona toe faaleleia ai se nofoaga na iloga ona lepetia e le galulolo 2009.

O le ta'ita'i malaga, tama'ita'i o Sarah Gosper na faailoa le agaga fiafia tele i lenei avanoa e le laumua mo ia ma le 'aumalaga. Mo le to'atele, o le taimi muamua lea ua asiasi mai ai i Samoa, aemaise o le avanoa e tofo ai i lenei aganuu a Samoa. O isi sa faailoa le agaga faafetai i le talimalo lelei a o tatou tagata.

E lua vaiaso o le Polokalame, latou te mata'itu ai le tulaga o le lava o a tatou meataumafa, i se asiasiga e aofia ai isi motu Pasefika.

Saili Aukuso. **Ata—OLA**

TALA A'OGA I LOU VAIFANUA: SAILI AUKUSO & LEVI TAVITA

Avea pea atina'e a'oga ma faamua i fesoasoani

O LOO AVEA PEA le atina'e o a'oga ma se faamua pitoiluma a malo ma faalapopotoga o loo faipa'aga ma Samoa. O se matau lea a le OLA i le gasologa o galuega faatino e fesoasoani mai ai i latou i le atina'e o Samoa.

O le faaiuga o le masina na se'i mavae na faailoga ai le tulaga e fauina ai le falea'oga a Vaigaga Tulagalua. Sa auai atu le palemia ma ta'ita'i o le malo i le faamoemoe.

O se poroketi e \$5.8 miliona lona tau, sa faatupeina e le World Bank international Development Association (IDA). Ma o se galuega fou leni e sui ai le falea'oga sa fausia i le 1984, ma iloa ai lona tulaga lamatia tele mo fanau a'oga. O lea na tonu ai i le malo o le tatau ona toe fauina i se tulaga mausali ma saogalemu nai lo lena sa iai.

Sa talia le talosaga o le faatupega mai le faletupe ma taulaga ai loa le faamoemoe.

Na saunoa le palemia, Fiamē Naomi Mata'afa e faatatau i le taua o fausaga e mafai ona tali atu i suiga ogaoga o le tau, o lea fo'i le faamoemoe i le malo ina faasalafa sea fuataga i falea'oga uma a le atunuu. O le a avea ai le falea'oga a Vaigaga ma se nofoaga e mafai ona sulufa'i ma malutia ai tagata i taimi o afa ma mala faalenatura.

O se tala fiafia foi mo le A'oga Tulagalua a Faleatiu ina ua tuu mai le aao o le malo o Siamani, i le faatupega o le faaleleiga o se vaega



INIVESI A LE MALO. O loo ave ai pea le faamua i le atina'e o A'oga, i falea'oga ma lotoa a'oga Ata—Samoa Observer

o le falea'oga fou na mu ia Setema talu ai. E \$30,000 se vaegatupe e fia faaleleia ai vaega na satia e le afi.

Na saunoa le tu'ua o le nuu, Talimatasi Uili Matafeo, e faafetaia le malo o Siamani i lea agalelei. Sa auai le amepasa a Siamani i Samoa, Nicole Menzenbach, e fai ma sui o lona malo.

O le tolu ai lea o ni poroketi ua avatu i ai le lagolago tautupe a Siamani i leni tausaga.

Mo le poroketi a Vaigaga e mana'omia sina taimi e tālia ai, ae mo Faleatiu, o le a mafai ona

toe fa'aaoga le falea'oga atoa mo a'oga, i le taimi lava e mae'a ai le galuega faafou.

O loo matauina le faamamafa a le malo i a'oga, e pei ona molimau tala o tupe i tausaga ta'itasi. Muamua i falea'oga, e fesoasoani mai ai ana pa'aga malo masani, ae faapea foi faletupe faavaomalo e iai le World Bank.

Ae pei ona molimau fo'i ripoti i nisi vala o le atina'e a'oga, i popolega o le le mafai ona taofi faia'oga mai le tu'ua o le faiva, ona o nisi o mafua'aga e aofia ai totonu.

Tatalo fanau ina ia amana'ia o latou leo

O LE VAIASO TALU AI na feiloa'i ai i Apia ni usugafono mai le Pasefika e talanoa i le mataupu i aia tatau a fanau i leni itulagi.

O le talanoaga e fitoi tonu i sauaga faasaga ia i latou ma le le amana'ia o so latou leo.

E ese fo'i leni fono auā sa auai ni sui o le fanau. E iai le tama'ita'i o Monica Lesa, 9 tausaga, sa faapea lana upu, 'Ou te talitonu o le tele lava o taimi e leai ni leo o fanau.'

A o le alii o Semisi loane, 11 tausaga, sa faapea lana tala, e tatau i tamaiti ona a'oa'oina ina ia latou malamalama atili e uiga i le lalolagi ma pe faapefea ona puipui le paneta.

'O matou le fanau e tatau ona sa'oloto mai i sauaga ma e tatau ona fai tutusa, ma o a matou aia tatau e taua fo'i.'

O Monica sa faaleo sana faameo i le le mamā o le 'ea, ua tau le mafai ai ona manava.

O le ta'ita'ifono o le komiti o Aia tatau, Anne Marie Skelton, sa talanoa i le taua o le sootaga o aia tatau a fanau ma le tulaga pagatia o le 'ea ua fa'aonaina i gaioiga a tagata.

Sa fesiligia fo'i i le tulaga lē tutusa o malo tetele o loo taulamua i nei faiga, ma malo laiti



Nisi o le fanau sa auai i le fono 26 Malo Aafaatasi e talanoa ai i mataupu o loo a'afia ai le fanau. Ata- Myka Stanley Media

o loo mafatia ai. O lana tali, e tofu sao uma i le fo'ia o le faafitauli. O lana faamanatu, o se mea lelei le taulagalaga o malo na o loo pulunaunau mo se suiga.

Sa molimau fo'i le Faamasino ia Vui Clarence Nelson i le tasi vaega o aia tatau a fanau ua avea ma se mataupu tuga i Samoa. O sauaga faasaga i fanau ua umi na'ua ona tupu, ma ua

mana'omia vave se suiga, saunoa le faamasino. O lana molimau e faavae i mataupu o loo ia su'esu'eina, e le o fai ifo ae faateteleina.

E foliga o se faama'i i le Pasefika, e pei ona molimau le usufono Tuvalu, Letasi, o se tu masani a i latou le sasa o tamaiti. Tele nuu Pasefika e molia fanau i se solitulafono i le 10 tausaga. Ua valaau le Malo Aafaatasi mo le suiga i le 14.

TALA A'OGA I LOU VAIFANUA: SAILI AUKUSO & LEVI TAVITA

Su'e i le su'ega o se aia tatau a le fanau: Faatonu

O LE SU'E o se tama ma se teine i se su'ega o le aia tatau lea a i latou, saunoa le Faatonu Sili o A'oga, A'e'au Christopher Hazelman.

I se faatalanoaga ma le Samoa Observer na ia folasia ai lona taofi i lenei mataupu, na ia ta'utino manino ai i le le tatau ona faalavelaveina fanau mai se su'ega poo le a lava le mafua'aga.

Na ia ta'ua se tasi o mafua'aga masani, e iai le le totogia o le pili o le su'ega. E le o se mafua'aga lenei e taofi ai le fanau, e o'o lava ia i latou o loo faate'a mai le a'oga.

Saunoa A'e'au, o su'ega uma lava e aofia ai le atunuu e tatau ona avanoa uma i ai fanau i le su'eina. Ma o le tiute o le Matagaluega o le faata'oto o faiga faavae ma auala e tali atu ai i soo se faiga o loo vaioa ai fanau mai le su'eina o su'ega faavae aoao.

Ina ua fesiligia e le Samoa Observer pe le o se faiga lea e le tonu mo e e faamaoni i le totogiga o pili, na tali le faatonu, 'E iai lava lona lagona o le sa'o ma le tonu, ae i le iuga o le aso, e tatau lava ona su'e le fanau i nei su'ega.'

'Mo le matagaluega, o la matou tautua lea, e faia le tiute ina ia mautinoa e maua e fanau uma le avanoa e su'e ai,' saunoa Hazelman.

Sa fesiligia e le sui o le Nusipepa le faatonu i sona taofi i le poroketi o le Miliona Tala, ma le avanoa e fa'aaoga ai se vaega o lona tupe mo



SU'EGA FAAIU TAUSAGA: E iloga lona taua mo fanau matutua i le sauni atu i le olaga faigaluega. Ata—Samoa Observer

pili o fanau, e aofia ai pili o su'ega. Na tali A'e'au, e le aia le Matagaluega i lea mataupu ae na te iloa nisi o itumalo ua ave la latou faamuamua i a'oga a le fanau.

O se faiga poto lenei, saunoa A'e'au, o le a mafai ai e fanau uma ona avanoa i su'ega ma faamanuiaga o le auai i le a'oga. O latou o le lumana'i o Samoa, saunoa le faatonu.

Sa faamaonia e A'e'au nisi o mataupu i fanau e lei totogia a latou pili o su'ega, ae na

avanoa lava e su'e. E faapena fo'i i latou o loo faate'a ma a'oga, sa mafai lava ona su'e i se faiga faapitoa e faatino ai lea i le Ofisa Autu.

O nisi o itumalo ua ta'utino lo latou fa'aaogaina o le tupe e totogi ai pili o fanau a'oga, e iai na ua faatau ni pasi e momoli ai i le taeao ma toe molia atu i aiga pe a tuua. Iai foi ni itumalo ua inivesi ia latou tamaiti e ulufale i le Lunivesite Aoao a Samoa. Ua sauni fo'i e totogi o latou pili ma sauni e fa'aaauu, pe afai e sologa lelei ausiga.

Mae'a su'ega ae ua tālia ma le toto'a le i'uga

O LE FUAFUAGA e tusa i le polokalame o su'ega e nafa lea ma le Matagaluega o A'oga. O se tapenaga e taulamua ai le Faatonu Sili.

Na togia ai le aso 13 o Novema e amata ai, ae faaiu i le Aso Tofi, 23 o Novema. O lea lava sa gaoioi i ai le 'aufaisu'ega i lenei tausaga e tusa i se fa'aaliga a le Pule Faatonu o le Matagaluega.

A o sauni atu le fanau mo su'ega, na fa'aali se finagalo o le Pule Faatonu e tomatou ai le 'aufaigaluega i le taua o la latou pitola'au.

O le 'auga o le tomatou o le tapena lelei i ai ina ia sologa lelei mea uma mo fanau ma le 'aufaisu'ega fo'i.

Sa auilili le tomatou poo le tuualalo fo'i a le Faatonu Sili, e o'o lava i mataupu laiti e moomia ai le lava papale o le faisu'ega.

E le se mea fou le sau o se tama poo se teine e leai se peni poo se titina, pe tuai mai fo'i, ae le tatau ona otegia ai a o sauni atu i se galuega taua tele.

Faata'ita'iga, ia taumafai lava e momoli le faatonuga i se leo malu ina ia to'amalie lagona o fanau a o alo ia latou su'ega. Sa manino le fe'au a le alii faatonu i lea vaega.



E 85 pasene le aofa'i o fanau e a'o'oga i a'oga a le malo, 11 pasene i a'oga a le lotu ma le 4 pasene i a'oga tuma'oti

O su'ega e pei ona ta'ua e le Faatonu Sili, A'e'au Chris Hazelman, e aofia ai kolisi maualuluga uma, mai le Vasega 10 e aulia le 13. O su'ega o le Samoa National Junior School Certificate (SNJSC), Samoa Secondary Certificate (SSC) ma le Samoa Secondary Leaving Certificate (SSLC) o le tolu faavae i tausaga ta'itasi.

Lenei la ua mae'a le faatinoga aupito taua i le tausaga, o le tauluga o fe'au sa fai i potua'oga ma potu su'esu'e, ua tālia nei le i'uga.

Molimau le upega tafa'ilagi a le MESC, e 16,365 le aofa'i o tama ma teine a'oga i a'oga maualuluga a le malo e 42 le aofa'i. E 1,035 le aofa'i o faia'oga o loo galulue. Tusa lea ma se 15 tamaiti i le faia'oga e 1.

Faasoa o le Vaiaso:**la faamanino le uiga o le faitau, aia tatau a le fanau**

E IAI SE MAU e faapea mai e lei fuea e Samoa ana fanau i aso anamua, e molimau misionare ia Samoa o se nuu fai tama, e auau i fanau. Faapena fo'i se molimau mo tagata Maori ia latou fanau. E faavae ai le finau o le sau a i fanau o se mea na aumai e papalagi ma pulega faakolone. Ona o le tu faapologa sa lagolagoina e malo Europa i na aso, e faatonu ai le pologa i le sasa ma le aga sau. Aga faafitafita sa masani ai lea konetineti, sosolo ane ai i a'oga ma le faatonuga o tamaiti. Ua leva le fo'i o malo Europa ae piimau ai lena manatu e avea o se taofi faavae faaleaganuu, faalelotu fo'i.

A o manatu la nisi ua leva ona la'a i luma le lalolagi i lenei mataupu, ae le faapena i le tulaga moni o mea. O loo sasa pea fanau a tagata Pasefika, pei ona molimau le usufono Tuvalu i le tauaofiaga sa faia i Apia i le vaiaso na se'i tuana'i.

E o'o lava fo'i i malo tetele iloga atina'e, o loo tupu ai fo'i, pei fo'i o le molimau a le tasi o faamasino matua o le Faamasinoga Sili a Samoa, e le o fai ifo ae o lo'o faatetele. Ua lava lea e faamautu ai le taofi o loo tupu lava i totonu o Samoa ma le Pasefika.

E le fou lenei mataupu, ae e manatu le faasoa o se talanoaga o loo iai pea i se tulaga e le manino. E le o manino le uiga o le faitau, aia tatau a le fanau. Ona ua foliga e faapipi'i upu e lua, pule faitalia ma le aia tatau, ua avea ai o se mataupu e talia gata e le tele o matua, aemaise lava i le Pasefika. Auā o le pule e poloa'iina ai se mea e fai, pe faalala le aia a le fanau i matua, ma a'afia ai le va tapuia.

O le taofi faavae, e sili le iloa e matua o mea e lelei ai le fanau. Afai o le sasa e lelei ai, o lena. Ma o lena le auala o loo fa'aaogaina pea e le tele o matua pe a faasa'o pe a'oa'i fanau ua vaogata.

Ona ua iloa e fanau a latou aia tatau, o lea fo'i ua suia ai lena faia sa faumalo ai matua. O lea fo'i e taua ai se silafia manino i matua o aga o lena talanoaga fou.

O le a sau tali i le tulaga faaleiloga o si ou atalii?

UA TATOU AULIA mai le vaiaso o seleselega, e fia faalogo ai matua i se tala fiafia mai taumafaiga a le fanau i lenei fo'i tausaga.

Mai lava i A'oga Amata e aulia le lunivesite atoa fo'i a'oga a lotu, o le vaiaso lenei o 'ula manogi ma le feasogi fiafia. Ae mo se vaega o le fanau ma matua, o se itula o le loifofoga maligi, lagona o le ita, e ono tua i sauaga.

Na tatou ui mai ai fo'i, i lena lagona mimita pe a sili pe tulua pe tulima fo'i. Ae to'atele e le i tofo i le lagona o le uliva'a, lena pupula faanoanoa ae 'ata'ata lili le matua, se'i o'o i le fale. Ae e iai le teine na tulua ae na fue lava e lona tina ina ua ave e le isi teine le sili. O le mea e leaga ai, auā na toe ta'utino le faia'oga, na avane se tupe e le tamaloa e ana le afafine. O lona afafine e tatau ona tu tolu.

E le o matua uma e faapena, e iai fo'i isi e tali

E peisea'i o loo tulei e nisi o le 'aufaitonu a Malo Aufaatasi sea taofi i le tuto'atasi o le tama ma le teine i ana faaiuga e fai. Ae manatu le faasoa e le faapena le vaai a nisi o nuu ma ituaiga e pei o Samoa.

Auā i le aganuu a Samoa, e leai se tasi e tu na o ia, o le tagata ma lona faasinomaga, o le tama ma le teine i lena faavaa o se aiga, se nuu se faalapotopotoga. E seasea se tama ma se teine e pele lona aiga ona nofo ma fai se mea e ta'uvalea ai. Ua iloa fo'i suiga lelei i aiga e tuu-avanoa matua i se leo o fanau, ona maua ai lea o lena nofo femalamalama'i e auala ai se a'oa'iga 'anoa nai lo le sasa.

E le fesiligia, ua sui lava le taimi ma ua faigata fo'i le tiute a matua, ae talitonu fo'i i le malosiaga o le sootaga valalata o le matua ma lana tama. A lelei ona tapu'e lena sootaga mai lona tauafua, e faamata e iu i le manuia mo fanau.

O iai aia tatau faaleaganuu e pei ona finau mai nisi o le aufaitofa Pasefika. A o lagolagoina e lenei faasoa aia tatau a fanau i se olaga fiafia, se a'oa'oga lelei, avanoa i se foma'i ma vaila'au o togafitiga, ia sa'oloto mai le mativa ma le matelaina, ae e iai foi aia tatau auliuli na e tatau ona amana'ia e Malo Aufaatasi.

Muamua, ia avanoa le tama ma le teine i lana gagana muamua, i lana tu ma le aga, i lona faasinomaga e iloa ai ona ola fiafia i lona si'osi'omaga, ia iloa mea faatauina i lana aganuu o lona tofi mai le Atua. O mea na o loo te'ena i le tele o fanau, ma e talitonu le faasoa e le na o le fia 'ai le faafitauli, a o le mativa i le loto ma isi mea na e le mafai e se isi malosi ona faatumu.

E talitonu fo'i e o faatasi na mea e lua; e taua aia tatau a fanau i se olaga sa'oloto ma fiafia, ae taua fo'i a latou aia tatau i measina a o latou nuu. O le sini o A'oga, ia a'oa'o se nuu ia iloa le taua o na lalolagi e lua, aemaise i itu aupito lelei ma ta'uleleia. Ia sauni fo'i e tavae ese nisi o tu ma aga e le ni a tatou, e iai le sasa, ma saili atili fo'i iā tatou lava tofa manino auliuli, i tali o faafitauli. Ae sili ai, o le liuina e avea ma ni aga e soifua ai.

i le 'ata ma le faitala malie. 'Masalo o si o'u atalii e lelei lava ia i le faiumu.' O se tali fiafia lena mo se tama e le malosi i le potua'oga, ae malosi i isi tomali. E le tatau fo'i ona fuaina le poto i le atamai taofi. To'atele e vaivai i le Saienisi ae tuu ane i taaloga, poo le folafolaga o taumafa, e maua le A plus. To'atele e lei ulufale i se iunivesite ae manuia a latou taumafaiga i pisinisi ma atina'e.

E iai fo'i le matua e faanoanoa ona sa tigaina i le lagolagoina o le a'oga a le tama, ae leaga le tali mai. Faaluaina le faanoanoa pe afai e le popole lava ia i ai. Ae e iai fo'i matua e le i faia se galuega, ae fa'aali le to'atama'i ina ua lau mai togi e leai se tulaga o le teine.

La lea, e taua lau tali atu i le tulaga faaleiloga o le fanau, auā o lena e timata ai le upega pe a toe lalafo. Ae o se toe fafagu fo'i i lo ta tiute o sē e nofonono atu i autafa a o fai a latou meaa'oga.

TALA A'OGA LALOLAGI**OTOOTOGA****AOTEAROA: TIPI O PAKETI**

O loo feagai pea iunivesite a Niu Sila ma faafitauli tautupe, ua mafua ai ona tatipi a latou paketi. O nei tipi o loo a'afia tonu ai le 'aufaigaluega ma faapea ona vaea ai nisi ma faamuta a latou konekarate faigaluega. Taimi nei o loo vesia le lotoifale o Massey, ae le i mamao atu Vitoria i lenei popolega.

AOTEAROA: FAAFITAU LI MASANI

O le le lava o faia'oga i potua'oga o se faafitauli masani mo le tele o malo. Mo Niu Sila, ua lipotia le tauau ina faatetele, a o toe aga'i mai fanau mai fafo i totonu o le atunuu. Peita'i ua iloa le fai ifo o le numera o le 'aua'o'oga e fia avea ma faia'oga. O se tasi lu'i lea mo le malo fou o le palemia, Christopher Luxon.

AUSETALIA: VAOIA TAOFI FAAUPUFAI

Na avatu le avea'i a le Matagaluega o A'oga i ni faia'oga Vitoria, e vaoia ai lo latou auai i ni fa'aaliga i totonu o a latou a'oga, e faailoa la latou lagolago ia Palesitina. E manatu le matagaluega o ni gaioiga faapea e le tatau ona tupu i totonu o lotoa a'oga. Ae ese fo'i se taofi o faia'oga i le mataupu.

AUSETALIA: IUNIVESITE LELEI

E sili le iunivesite a Kuiniselani i le 10 pito i luga a Ausetalia i se su'esu'ega a le Australian Financial Review. E tulua lena a New South Wales, pito ANU ae tulaga fa Monash. Sa faia le iloilogaga e fua i le tulaga maoa'e o vaega e lua: a'oa'oga 'anoa ma le tulaga maualuga o su'esu'ega a faia'oga ma le 'aua'o'oga fo'i.

AMERIKA: VAELUAINA I TAOFI

I le taua i le va o Isaraelu ma Palesitina i Kasa, ua fa'aalia ai se eseese tele i taofi o le 'aumatutua ma le tupulaga talavou. Ua iloa le malosi o le lagolago a talavou Amerika i tagata Palesitina, ae ese mai o latou matua, o le to'atele e 'au ia Isaraelu. Ae sili atu ona leotetele talavou i le faailoaina o o latou taofi.

AMERIKA: SU MALO I LE \$40 MILIONA

E \$40 miliona le tupe o loo su ai e se tama'ita'i faia'oga le malo i le faalavelave na fana ai o ia e sana tamaititi a'oga, 6 tausaga le matua. O Abby Zwerner o se faia'oga i le setete o Virginia, na faao'o i ai e se tama 6 tausaga ni manu'a i se fana. Peita'i na sao mai ai, ma tonu ai ia te ia e fai lana tagi, ina ua manino le faatamala o leoleo i la latou tali atu.

Ne'i Mea Ane ua Galo

Lauaki (Lauati) ma le talanoaga faumalo a le malo o Siamani



ATOAI LE 108 tausaga talu le usugafono a Lauaki Namulauulu Mamoe. E le tau faailoā le suafa ae faapea foi le tala. O se ta'ita'i o Samoa na tula'i atu e faaleo lana tete'e i le pule faumalo a Siamani. O le iuga ua silafia, na faaunu'uua e le kovana o Wilhelm Solf, ma e lei toe a'e i fanua le folauga. I le motu o Tarawa o le atu Kilipati, 14 o Tesema, 1915, na maliu ai. Ae lei mate ai le tala. Toe o tusitusiga uma o le talafaasolo e ta'u ai le suafa o Lauaki, e tofu foi le tusitala ma lana mau e faatatau i lana tete'e. E piitia le taofi na mafua le tete'e ona o le aunoa se agaga i le kovana ma le pulega e amana'ia le pule o le fanua.


E lagolagoina foi le taofi o ia o se avemau (campaigner) sogasogā ma le to'aga. E le na o se tasi e faalele upu ae sa tu ma savali, toe o nuu uma o Samoa na asia, i le moliga o lana mau. E tele nuu i Tumua na te'ena ma tausui i le avefe'au.

I le ma lenei, o ia o se faamata'u malosi i le kovana ma ana fuafuaga, na mafua ai le iuga faigata e faatafea. E tele talanoaga eseese e faavae mai i le tala ia Lauaki. Muamua o lena a le kovana ma lana faigamalo. I sana lauga i Savaii, i se la fetalia'iga ma Lauaki, na ia faatusa ai upu a Lauaki i na o se 'ava taeao ua mai; ma tuua'iina o ia o se faalavelave i le fiafia o tagata. Ua iloa le sini o le saunoaga, ina faasinoesea Lauaki o se tasi o loo ia faavevesi le atunuu.

I le fa'aaogaina fo'i e le kovana o le lotu e puluvā, o se tasi lea ana auala e faataunuu ai fuafuaga a le malo. I Upolu i se tasi ana lauga e iai upu nei: Talofa e Lufilufi! Talofa e Leulumoega! O fea lau pule ma lou mamalu! O lena e te nofo i le paolo. Toso i lalo ou tou faleo'o ae o i Safotulafai! O la e iai le pule ma le mamalu, o la e iai le pule i luga o Samoa. Ua avea lou tou mamalu, auā ua togia Lauati na te tofia Tupu. O ia le ua na faae'e papa—ae le o outou. Na ia faau'u Mata'afa. Na te toe fa'au'u foi ia lava —e Tafa'ifa— ma o le a o atu foi ma lana masiofo o Sialataua i Mulinuu ma avea ma alii ia te outou vale e.

E le maualuga foi se va'ai a Lauaki i le kovana, e iai upu nei: Oi, o le kovana o se tagata lelei tele, peita'i e tele le faitogafiti. Muamua o lona vaevea o itumalo, e faavaivaia ai latou, ma ia ave ese uma le pule mai le Ta'ita'i-itu, ma lena e lata mai, o lona faafitia iā Samoa o le tulaga maualuga o le Faamasino Sili. I tua atu o lenei, o le a aveese foi e le Kovana le tofi o le Alii Sili, ma le toe iai ni tofiga maualuluga mo tagata Samoa.

O aga ia o le talanoaga i le va o Lauaki ma le Kovana, na te faaoloatauaina ai Tumua i le va ma Pule (Savaii), ona o lona popole i ni pefea e tula'i mai pe a tutu faatasi Samoa. E tele foi isi talanoaga, e pei o lena i le itu a Mata'afa, o le sa lagolago e Lauaki i le tofi o le Alii Sili. Faapea isi tamaaiga sa faatuu'ala i le finau a Lauaki. Atoa foi Tumua sa lagolago i le malo. E faapena foi le lotu i ana misionare ta'iulu sa lagolagoina le malo.



~ TESEMA 1-16 ~

1

1875 Taunuu i Apia le HMS Barracouta fai se fofo faafitauli Sitanipeka

3

1894 Maliu RLS (Tusitala) i lona fale i Vailima
1918 Taunuu i Apia le vaa Encounter Ausetalia e fesoasoani togafifiga o le fulu Sepania

4

1889 Fonoa Lepea ma alaga ai le tupu o Malietoa Laupepa; 17 tamalii mai Tutuila auai
1955 Maliu afafine o Dr Solf 'Sooaemalelagi' i Siamani 'ai lima o le Nazi
1991 Maliliu 15 afa o Valelia, afaina tele motu o Savaii

5

1894 To atu e le Komisi o Fanua se 75 afe eka i talosaga Siamani, 36 afe i tagata Peretania, ma se 21 afe i talosaga Amerika
1914 Poloa'iina se vavao o le faatauina atu o le 'ava malosi i Apia
1984 Toe tatala fale o RLS (Tusitala) i Vailima o se mata'aga mo le tusitala Sikotilani

6

1787 Iloa le motu o Ta'u mai sasa'e e le alii vaa Farani o de la Perouse (Peruse)

1928 Apia. Faasala Tupua Tamasese III e 6 masina toese Mt Eden Aukilani Niu Sila

7

1889 Taunuu i Apia tusitala RLS ma lona aiga i le vaa Equator

1941 Faamamalu tiute o le vaega'au Samoa ma le Malini Meleke

1957 Malo Tuna Scanlan fusi paga ogatotonu a Niu Sila ia Billy Beazley ko T3

8

1966 Taaloga Pasefika auro muamua Samoa ia Paul Wallwork

2001 Tokyo Siamupini Mark Hunt K-1 Grand Prix fusukiki Iapani

9

1787 Tuutaula de La Perouse gatai o Tutuila

11

1787 Osofa'ia nisi o le auvaa o la Perouse e tagata o Aasu, maliu ai lona soa & seila e 11

13

1946 Talia tausiga o Samoa e Malo Aufaatasi
2012 Taia Samoa e le afa o Evan, 5 maliliu

14

1915 Maliu Lauaki Namulauulu i Tarawa
1918 Aofia Samoa atoa i le fulu Sepania

15

1976 Avea Samoa ma sui faamaoni UN

I le iuga, na tu na o Lauaki.

O nei uma talanoaga e ao ona manino i ai, pe a fia maua se malamalamaga lelei i le tete'e a Lauaki. E maua lea i aano o upu ma fetalaiga a i latou sa taulamua i upufai o Samoa, aemaise i itula taua o lo tatou tala. E iai le taofi e faapea o Lauaki o se tagata lotonuu ae na te lei mamateina aga a le taimi, e talia ai le pule a malo tetele e le faigofie ona tete'e atu i ai.

I taimi a o maua se to'a i lalo o pulega a Siamani, ae lei maua ai se fiafia o Lauaki. Aemaise o lona tilotilo atu a o faoa malie le tofi o Samoa e ni malosi ese. O le ute lea o lana tete'e malosi o se matai Samoa.

I le amataga o le tausaga 1909 na auina atu ai e le Kovana o Solofa se vaega'au i Savaii e taofi le fouvale a Lauaki ma le Mau a Pule. Fai mai e fa ni manua o na faalautata'i i le va o Upolu ma Savaii e taofi ni sui e sosola ese.

Ia Aperila i lona aso 1 na siilima ai Lauaki ma molia atu loa faatasi ma isi ta'ita'i o le Mau i Upolu, a o le aso 19 na tuuvaa ese ai ma Apia mo le taimi mulimuli. O le amataga lea o le fa'atafea a Lauaki Namulauulu Mamoe.

I Saipan o le Atua Mariaana na tuli ai lona faasalaga faatasi ma isi e to'a 71, e aofia lona to'alua o Sivaotele ma la laua tama e to'atasi o Tivoli le suafa. Na a'e le tafeaga ina ua sui le pule i Samoa, tula'i mai Niu Sila, peita'i na le i tau le faamoemoe mo Lauaki. I le motu o Tarawa o le Atua Kilipati na maliu ai a o tau saili fofo i sona gasegase. Na o lona to'alua ma isi na fa'aaua le malaga i le nuu moni.

O nisi na toe fo'i e aofia ai Leiatua Mana, Taupa'u Puaesi, Tagaloa ma Malaeulu. O

ponaivi o e na maliliu i Saipan na fo'i ma i latou. E aofia i e na maliliu suafa nei: Asiata Taetoloa, Tevaga Letasi, Tuilagi ma le uso o Lauaki, o Pulali, e pei ona molimau le alii tusitalafaasolo o Te'o Tuvale. O le tala ia Lauaki ua silafia lava; o lana tete'e (Mau a Pule) o se tasi pine tumati'e i lo tatou tala faasolo. O se tala o loo su'esu'eina pea, aemaise i le vaai a o tatou lava tagata su'esu'e, e pei o lena a le alii su'esu'e, Dr Brian Alofaituli, NUS, lata mai nei.

Mulia'i, e manatua e lenei itulau fanau ma o latou aiga, o feagai ma fita ogaoga ona o taua ma fevaevea'iga. Ukraine ma Rusia i Europa, Kasa ma Isaraelu, ma isi nuu. Ia manatua i latou ia tatou tatalo, ma 'aua lava ne'i galo lesona o taua e faamanatu mai pea mo i tatou fo'i, aemaise i le tāua o le sao o ta'ita'i o ni tausimea a le Filemu, i lo tatou lalolagi.



UILI FAU UPU

Saili tali o fesili o lo’o i lalo. Pule oe pe sipela i luma (clockwise) po’o tua (anticlockwise).

E sa le feosoosofa’i.

1. Tusi mai se uiga o le upu *iloa* i le 1. Samoa 2. Igilisi:

2. Sa’ili ni upu se 5 e faai’u i le fasiupu *ai*

3. Su’e se upu e 9 mata’itusi ma tusi sona fa’amatalaga:



4. Tusi uma upu/ fuiupu e ta’i 3-9 mata’itusi, ma o latou soa i le Igilisi (E faitau ai ma upu ta’ua i le 1, 2 & 3)

Lelei atoa = 12 upu


Lelei tele = 8 upu

Lelei = 6 upu

PASO I GAGANA E LUA /18

Faatumu i upu/igoa Peretania e soa tutusa (va’ai i le fgt.)

Fill crossword with English words/names



©LPSL TAVITA

Faalava ~ Across

1 Pupula (6)

4 Faatali (4)

8 Tuna (4)

9 Keriso (6)



11 Aso Sa (6)

12 moni,

faamaoni (4)

14 potu umia

e masini (2)

15 popolega

ua mafatia ai

(6)

19 nofo, faatalitali (4)

22 Faapuupu: Feagaiga Tuai

(Tusi Paia) (2)

24 tagatanuu moni Niu Sila (5)

27 se tama’i motu (5)

28 Faapuupu: laufali (3)

29 Se fausaga o se oloa (5)

30 falaoa mata (5)

Lalo ~ Down

1 Amuia! (7)

2 o atumotu (7)

3 Malo! (2)

5 Tula’i ia! (5)

6 atoaga (5)

7 Upu ofo (3)

10 Fua o le saosaoa (4)

12 Tino: o le ivi’aso’aso (3)

13 Sooupu: ma (le) (3)

16 Upu Maori mo le i’a (3)

17 leaga ai, ta’uleaga (3)

18 Tali: ioe, fialia (2)

20 ‘fale o tagata Esikimo (5)

21 ulufale (5)

23 se misa laitiiti va o se uo (4)

24 potopotoga tele o tagata

faatupuvevesi (3)


25. igoa o lenei puletini (3)

26 Faapuupu: ofisa lafoga (3)

API the Word Builder

Rules:

1. Build as many English words as possible, start with three letter words.
2. Every word you build must include the Alpha Letter (centre).
3. Each letter is used only once, including the Alpha Letter.
4. The class as individuals or groups can play this game. 1 point for one three letter word, 2 for four letter word, 3 for five, and so forth.



Three letter words

Four letter words


Five letter words

Six –seven letter words

ADDITIONAL ACTIVITY: Make a list of other words that are spelt without the Alpha Letter E.g. PEN


SUDOKU ~ TAALOGA I NUMERA

(sudoku.com)



~ TAALOGA PASO SAMOA I LE GAGANA SAMOA & POTO LAUTELE ~

1. Faatumu le pusa i upu/igoa Samoa poo se tasi e faatonuina.
2. E leai se tasi na maua le faatulagaga sa'o o le paso lomiga 18.
3. Ua si'i le tatou faailoga i le \$150, mo se e mua'i faatumua le paso i lona sa'o atoatoa.



Copyright LPSL Tavita 2023

FAALAVA ~ ACROSS

1. Afioaga afio ai le Matua o Tago (6)
4. Afioaga tua'oi ma Sapo'e Falealili (9)
9. Afioaga e iai le suafa Fuimaono (6)
15. o le tala o se nuu mai le afuaga (11)
16. faasino le ala tonu, taula'i i le sini (11)
17. Tatau le niu ae ā le 'ula? (3)
18. Tusi Paia: se faalagiga o le Atua (4,1,6)
24. fe'au o le aso (6)
25. Itu: Ua logo le nai _ (4)
26. Se suafa matai ae igoa ai foi se laau faisua (2)
28. igoa o se i'a (8)
32. ma'ona: _ le moa (3)
33. Gaoa se laufanua (3)
35. a'e se faiva e le manuia (5)
36. Kalama: se fasiupu fau ai veape (2)
37. Leo sa'o: vae (la'a/la'u) (3)
38. Alefapeta: Leo lona 10 (2)

40. Malo Samoa: Suafa matai faamasino sili talu ai (9)
41. Vaolia Samoa: E _ malaē (2)
42. Igoa sa'o o le i'a: la'i/la'o (3)
43. 'aisi i se tautai mo ni i'a (6)
44. se fasi poloka fafie (2)
46. uo tama a se teine (3)
47. leo pe a tau mole (2)
49. Pese Fau'ula: A ou vaai i ou _ (8)
50. Leai se mea e maua (3)
52. Se fesili masani (1,1)
54. Se tasi e taulia i le saofa'iga (7)
57. la'ei (se isi upu) (3)
59. faigata le amio a se talavou (2)
60. Tala o Samoa: Le uso o le tupu o Galumalemana na faia'ina i le la taua (4,7)
61. Faafeagai o le o ifo (1,2)
62. se tasi e te masani ma tafafao (2)
64. Upu faasino tulaga: e ta'u mai le itu e sau ai le pasi (3)

67. Saili le fuiupu lilo: (5,3)
72. se tasi ala (channel) o ata TV (6)
73. se la'ei masani ai tama'ita'i Arapi (7)
77. se iniseti e tele ona ituaiga (2)
78. Musika: do, re, mi, fa, sol, _ ti, do (2)
79. igoa o se vaalotu asia Samoa taimi o misionare (8)
83. Se misionare lauiloa i le atina'e Gagana Samoa (6)
86. tali malo se aiga (7)
90. e 'u'u ai se mea (2)
91. Alefapeta: leo 16 (2)
92. Afioaga Falealili afio ai Leilua (8)
93. Se afioaga i Salafai (6)
94. Suafa o le Atua Samoa anamua (7)
95. igoa o se i'a (2)
96. alu televave se tala (2)
97. lelei le tau, avanoa lelei (6)
98. Pese lotu: _ mai ia kitara (2)
99. Afioaga i Lotofaga (5)
102. vaa tetele la'u uta (7)
104. se vao tele i Falealili-Siumu (3)
105. 'Ava: " _ le inati o le tanoa" (3)
106. Faitau faale Tusi Paia: tausaga e faitau ai le laasaga mulimuli o le malaga faaletagata soifua (9)

107. Alu se ave'a'i e aumai se faife'au (5)
108. Upu tuai: ta'u ai tausoga tama fafine e leoleoa tamatane (7)

LALO ~ DOWN

1. faaleagaina (5)
2. o se i'a (5)
3. 'auaiga o Fao (5)
5. tapena lelei se malaga (5)
6. igoa o se 'aufaipese (5)
7. Vaalele a Fiti (2,4)
8. Malo Samoa: Se Faumuina sa minisita o Falema'i vaitausaga 70 (7)
10. Afioaga sa nofo ai Misi Parate (4)
11. Malo Samoa: Fofoga Fetalai mai le 1961 aulia le 1967 (4,8)
12. Lau o se tusi faitau (6)
13. vevela tele (4)
14. Afioaga tua'oi ma Utulaelae (5)
19. o se tama'i 'ofe fagota (3)


PASO SAMOA TAALOGA MAUA LE TAU TUPE \$150

20. se'i i luga ni laau e iai talo (3)
 21. Lagona o Herota ina ua le toe fo'i ane makoi tusa i lana faatonuga (3)
 22. Upu Maori mo le mea'ai (3)
 23. se vaega pito a luma o le tino (4)
 26. Auala saili ai se faiga malo (6)
 27. Aso soifua o le Keriso (10)
 28. Vaega o le fale Samoa afio ai tapa'au (9)
 29. Upu o 'ava: "Se sua'ava o totoe, _ ma le leo" (6)
 30. o se ma'a e fagota ai le fe'e (9)
 31. se vaega o le galuega o le gaosiga o le 'afa Samoa (6,3)
 33. Aganuu: nofoaga o fono a nuu poo itumalo (5)
 34. e tele aano (4)
 36. tofo e 'a'ala pe tagi ai mata (3)
 39. se nofoaga tafafao ai turisi i le va o Aleipata ma Falealili (8)




45. tamaoaiga o se tagata (2)
 48. faasalaga (3)
 51. Laasia (se isi e tutusa) (7)
 53. faata'ita'i ona fai (2)
 55. se mea'ai fai i fa'iotā (3)
 56. talatalanoa i le po (6)



TALI PASO SAMOA LOMIGA 18



TALI PASO 18—LUA GAGANA



©LPSL Tavita 2023



Tulimanu a Pola



Soifua manuia i le mamalu o le aufaitau a le OLA Puletini A'oga, malo le pale, vi'ia lava le agalelei o lo tatou Tapa'au Sili, toe o se aga tatou aulia le Kerisimasi. Malo le folau manuia.

E lua lava tautua e fua i ai le talimana'o a se malo i ona tagata, muamua o le soifua maloloina, lua, o a'oga. Ae e faamoemoe lena lua i le manuia o le tamaoaiga. Gaosiga o le tamaoaiga e mau eseese faigamalo, ae poo le a lava le auala, ae o le 'auga lava, ia lelei faamalieina mana'oga o le lua sa ta'ua.

A ua iloa lava le moni, faigofie le ta'u a o le faatino le isi pito. O se gaioiga i le faapaleni e lelei ai nisi malo ae oti isi, e o'o lava i malo mauoloa. Ou te manatu, a iai se malo e poto i le tomai lea, ma iai foi se 'vaai mamao' i le lumana'i o nei tautua, o lena e ave i ai le faalupega—Tausimea Sili.

Inivesi i lou soifua maloloina o se savali taua mo soo se tagata, aemaise i malo tauatia'e. O se fe'au e ao ona toto i le loto, ma soifua ai foi. Manaia le manatu o se tasi faia'oga, e mafai ona fa'aaoga le miliona a le malo e fai ai ni foma'i a o ni faia'oga fo'i i nuu ta'itasi. O lo latou tiute, ia momoli le fe'au o le tausia lelei o le soifua o aiga. Ae le fesoasoani le mau oloa mai fafo mo fanau, e tumu i suka ma masima. I le iuga, e toe fo'i i le malo lena avega—pe telē le tupe e ao mai, ae le tutusa lava ma lena e fa'aalu.

Ou te lagolagoina le faasoia o le vaiaso, ia maua le faapalepale ia i tatou matua i le tutusa o so tatou naunau ma le tali mai a le fanau i laugatogi o lena tausaga. Ou te manatua le tala i le tama saulupo a Apelu Aiavao. E ala eseese le foa'i a le Alii i fanau, afai e vaivai le tulei i le potua'oga, atonu e lelei i le lakapi maua ai se lumana'i manuia.

E malu la tatou Gagana ia i tatou lava. Fai mai le faailo i luma o se tasi faleoloa—Toniga A'oga. Ua 60 tausaga o le malo o Samoa ae o loo sese pea le sipela o lea upu. Ae ou te fiafia i se tasi Alaleo Leitio e faapea mai—Seti nofoa, ofu toleni. loe, e fai si ta'ugatā o le 't' mo nisi a tatou upu nono, ae sa'o le taleni, napeli—mai le Tusi Paia. O le faguga ae le o le fanuga. Tapoleni, lena. O le lu'i, faata'ita'i, tusa pe tau magiagia ai fofoga, e iu a ina masani, ae iloa ai lou poto i le tatou kalama. O loo iai lava a tatou tusiupu e tapa i ai.

Ae o nai motuga'afa fo'i na a Pola e faaiu atu ai lena tausaga. Tele lava mataupu ae ona pau o le avanoa ua maua, i totonu o la'u Faatafafa lea ou te omia ai. Se 'aleu o le tautua i lena tausaga, faafo'i mai. A ia filemu pea Samoa. Toe feiloa'i. Manuia.

O LE TALA: SI'I MAI I LE TUSI—O LE GALULOLO, SAUNIA E LEUA LATAI

O LE ASO FAAGALOGATĀ

Tusia e Junior Falefatu Faamatuainu
Aleipata Junior Secondary School



Ata: Google Image

I LE TAEAO o le aso 29 o Setema i le tausaga 2009, sa ou ala a'e ou sauni i le a'oga. Ua uma ona ou sauni ou la'ala'a lea i le matafaga e faatali ai sa'u lifi ou te alu ai i le a'oga. Peita'i sa lilo i manatu se mea o le a tupu i lea taeao, 'ai o le finagalo lea o le Alii.

Ina ua maua la'u lifi i le pasi a Faapalo. Sa aga'i le pasi i le mea o loo iai pitonuu ia o Lata ma Lefaga i le mea o loo iai turisi a Taufua faapea ma isi. Peita'i sa lilo i manatu o la'u toe vaai lea i turisi, faapea ma nai tagata.

Sa tu le pasi i le mea o loo iai le falea'oga o Vaisulu.

Ina ua ou oso i lalo ma le pasi sa taia i o'u taliga le feavea'i solo e le matagi o tala a tamaiti, o loo faapea, sa lulu le mafui'e i lea taimi. Ai o le salutulutu o le pasi sa ou le lagona ai. Ae e lei lava lava ae ta loa ma le logo e o ai tamaiti e fai le lotu.

E lei lava ae toe ta foi ma le logo e o ai i vasega. O logo uma nei ua masani ai la'u faalogo i aso uma.

A o loo amata pea la matou mataupu

muamua, i se taimi poo le kuata o le valu, a o faagasolo pea le mataupu muamua, ae ou lagonaina loa le ta faalausoso'o mai o le logo a le Ekalesia EFKS i luma ane o le matou falea'oga.

E le'i umi, ae ou lagonaina loa le tualaga a la matou faia'oga o loo faapea mai, "Tamomo'e i gauta."

Sa ou tamo'e ma lo'u le mautinoa poo le a le mea ua tupu. E pau lava le mea ua i lo'u loto ma lo'u agaga, ua na o lo'u aiga.

A o loo fa'aauau pea le matou savaliga i le auala galue o Saleaamua, sa ou lagonaina le tagi masusu a si a'u uo. O si a'u uo lea e ma te nonofo faatasi i le nuu o Lalomanu. E tagi lava ma faapea, o lona tina ma nai ona tei, na faapea lana tala o le latou fale e tu latalata i le sami.

Ina ua ou toe fo'i mai i tai, o se vaaigna faamomoiloto i le mea na tafili sauai le mala faalenatura. O fale sima, fale laupapa faapea ma le uafu ua faaleagaina uma e le galulolo.

Ina ua ou o'o mai i lo matou nuu, o se va'aiga uiga ese ma le mata'utia.

O tina ma fanau pele ua vala'auina e le Alii. Pe a fai o le finagalo lea o le Alii!

O tina ma fanau pele ua vala'auina e le Alii. Pe a fai o le finagalo lea o le Alii!

SOLO

Ia fa'aavanoa le taimi

(o se taiala ta'uta'ua o le olaga,
i le faaliliuga a Tupua Tamasese Efi)

Ia fa'aavanoa le taimi e te manatunatu loloto ai,
auā o le faavae lea o le pule;

Ia fa'aavanoa le taimi e te ta'alo ai,
auā e fa'aauau ai lou malosi faatamatane;

Ia fa'aavanoa le taimi e te faitautusi ai,
auā o le punavai lea o le malamalama;

Ia fa'aavanoa le taimi e te tatalo ai,
auā o le malosiaga sili lea i le lalolagi;

Ia fa'aavanoa le taimi e te alofa ai,
auā o le meaalofa faapitoa a le Atua;


Ia fa'aavanoa le taimi e te agalelei ai,
auā o le ala lea i le fiafia ma le olioli;

Ia fa'aavanoa le taimi e te 'ata ai,
auā o le pese leo malie lea o le agaga;

Ia fa'aavanoa le taimi e te foa'i ai,
auā ua pu'upu'u naua le aso mo le agaga faapito;

Ia fa'aavanoa le taimi e te faigaluega ai,
auā o le tau lea o le iuga lelei;

Ia fa'aavanoa le taimi e te fai ai galuega alofa,
auā o le ki lena i le faitoto'a i le lagi.



FAASOA FAAPTIOA A LE MASIOFO FILIFILIA TAMASESE MOLE KERISIMASI:

O faia'oga mea uma lava



LE MATAUPU na tuuina mai e le Ofisa ia te a'u o loo faa'upuina i le gagana Peretania "all for education" ma ua ou faauigaina o mea

uma mo a'oga. Soo se mea e maua ai le a'oga, e mafai ona faia'oga mai ia i tatou.

E mafai ona faia'oga mai le la, le masina, le fetu, le paneta, le si'osi'omaga, le tagata. E mafai ona faia'oga matua, faifeau, faia'oga, tagata matutua ma tagata talavou.

E mafai ona faia'oga tagata talavou auā fai mai le Tusi Paia "e fai miti a toeaia, e iloa foi faaaliga e taulele'a". E mafai ona faia'oga le tagata matua ae mafai foi ona faia'oga le tagata talavou – auā e le faapito le fe'au a le Atua i le tagata matua, e le faapito foi i le tagata talavou.

O se taimi ua auala mai le fe'au a le Atua i le tagata matua, o se taimi ua auala mai le fe'au a le Atua i le tagata talavou. O ai lava o i la'ua ua momoli iai le fe'au a le Atua e avanoa ona faia'oga mai ia i tatou.

E faia'oga mai foi le la, le masina, fetu faapea ai ma paneta ia i tatou, auā latou te faailoilo mai le vaitau o faiga faiva ma vaitau o folauga, le mafua o laau ma le vaitau o toufi.

E mafua isea ona faaigoa le Auala a Solosolo o le Maile? Auā e iai a'oga taua e maua mai i aga a le maile. E mafua isea le Auala a Falefa lea e faaigoa o le Laumei? Auā e iai le fe'au e momoli mai e le 'anava a le laumei.

E mafua isea le tima'i a le Tusi Paia e te alu e a'o mai sau amio i aga a le loi? Auā e maua mai ai lau a'oga i le galuega e fai to'aga ma le tau i lona galuega.

Fai mai se mau 'autu a le Mataupu Silisili ma Saienisi, e vaevaeina mea uma o le lalolagi i mea e ola ma mea e le ola (animate and inanimate). O lea la, fai mai latou o le maa e le ola ona e le tupu ma e le fanau mai, ma ua fua ai le galuega faia'oga a le maa i se fua māmā. Ae o le mea moni e iai le ola i le maa, aua a olo le maa i le isi maa e maua le aloiafi; auā foi o le maa, e

afua mai i le afi poo le volcanic action ma o loo iai pea le mana, le paoa o le afi i totonu o le maa.

I le fua lava lea o le animate ma le inanimate, fai mai le Mataupu Silisili ma le fua faasaienisi e leai se ola o i le vai. Ae o lea ua toe faamaonia nei i su'esu'ega a Saienisi, e iai le ola i totonu o le vai ma e logo i faamatalaga a tagata aemaise i upu fiafia, i upu faamalo, e faaosofia ai se malosi ma se mana faapitoa i totonu o le vai.

Letioa fo'i le upu i le gagana Samoa o le Vaiola ma le igoa o le punavai i Falefa o Tafaaola, faapea o le vaisa na aumai e le Tui Manu'a ia Tui Atua Leutele Leiite fai mai a sausau pe mili ai se tagata ua maliu i se manu'a i se taua po o se taaloga, e toe ola mai. E mafua ona vaiola ona e iai le ola i totonu o le vai e faaolaina le tagata. O lona uiga, o loo iai le mana ma le malosi i totonu o le maa ma le vai e avanoa ai ona faia'oga ma ia i tatou.

O se tasi o mataupu fita o loo feagai nei ma le lalolagi e ono faa'upuina i ni fesili se lua:

1. Pe iai se lumana'i o le lalolagi?
2. Po ua lata mai le gata'aga o le lalolagi?

O se tasi o mafuaaga 'autu o lenei faafitauli, ona ua faatuatua'ia i le mau 'autu lea e faatu mai nei; auā soo se mea, e iai lona aogā ma e mafai ona faia'oga mai lona aogā ia i tatou.

O le faafitauli, ua mafua ona o le fuao, le faumalo ma le faaloloto o le tagata. Fuao i le faafeagai ai ma le Atua, auā o le Atua o le tapu e mafua ai le va tapuia i le vafeagai ai o le tagata ma le uso tagata, le tagata ma lona si'osi'omaga, le tagata ma le la ma le masina ma le fetu ma le paneta.

A leai loa se tapu, ua le malu le si'osi'omaga, ua le malu fo'i soo se mea i le lalolagi e aofia ai ma le uso a tagata.

Faumalo i mafauauga ma le pule, e mafua ai ona le malu aia a le uso a tagata. Ua le malu fo'i se meaola po o le lau'ele'ele i le agaga faumalo.

Ona oo mai lea o la'u faamatalaga i le faaloloto. O le a amata mai la'u tala i le mau faa-Samoa. Fai mai ia muamua sa o Manuvao.

O lona uiga, ia muamua fai le taulaga i le Atua o le vao ona faato'ā oia lea o le laau. Auā e tapu le ola o le laau ma e tapu fo'i le vafeagai ai o le tagata ma le laau – o le tapu o le ola o le laau e mafua mai le Atua e mafua ai le ola o le laau.

Pe ana tausisia le vatapuia o le tagata ma le laau, tatou te le vaaia le soona faatama'ia o laau, e mafua mai o le faaloloto, ae galo ai le galuega taua a le laau, o le faamamā o le 'ea e manava ai le tagata ma puipui i le vai e taumafa ai le tagata.

O le faafitauli o le vai e te maua mai le valo'aga ua mamafi i le gagana a le 'au saienisi, "o le isi Taua o le Lalolagi, e mafua ona o le tauaoga o le vai". E ataata mai fo'i le mau lenei i le faafitauli mata'utia lea e aliali mai i Darfur i Afelika. E mafua ona se'e tagata ona o le naumati o le vai. Ae mafua le naumati ona o le soona faatama'ia o laau.

E le tula'i mai nei mea pe a na tausisia e le tagata le mau "Mea uma mo A'oga". Auā a na tatou faataua le aogā o mealofoa a le Atua, tatou te le faatama'ia lo tatou si'osi'omaga. Tatou te le faatuatua'ia i le 'apo'apoina o le vai. Tatou te le faumalo i le vafeagai ai ma le uso tagata.

Toe fo'i mai la'u tala i le mau 'autu "mea uma mo a'oga".

Soo se mea na faia e le Atua, e iai lona aogā ma e mafai e lona aogā ona faia'oga mai ia i tatou. A tatou aloa'ia le galuega faia'oga lenei, ona malu lea o le va tapuia. Ma a malu le va tapuia, ona avanoa lea o mea uma na faia e le Atua e momoli mai la latou galuega faafaia'oga, le galuega faamalamalama, le galuega faasinoala ia i tatou.

Soifua ma ia manuia!

O lenei saunoaga o se meatotino a le tusitala. Ua puipuia e tusa ma aia tatau faaletulafono.

SE TALA O LE KERISIMASI MAI IA M. A. FILEMONI, FAAVAE I NI MEA MONI SA TUTUPU; TOE FAAMATALA E LE OLA: ATA MANUAO METOTISI I PORIRUA NIU SILA

O le manuaos sesē ~ ~ ~



"Sela! Sela! Ala i luga si a'u tama! Fai sou ofu ta o e fai mai le faatau. O nanei e sau ai le manuaos," o le vala'au lea a le fafine o Saumolia i lana tama teine, 10 tausaga le matua.

Ua te'i a'e Sela, ua mili ona mata ma faapea si ana tala, "Ia, e lelei fo'i pe a oo mai lena manuaos i le tatou fale. Manatua e le'i o mai i le tausaga lea ua te'a!" o Sela lea, ma tilotilo atu i lona tina.

"Se e o mai, e le mafai ona le o mai," o le tali lea a le tina ia Saumolia.

E sa'o Sela, e le'i oo mai le manuaos i lo latou aiga i le Kerisimasi talu ai. Fai mai ua le lava le taimi.

O le tina ia Saumolia ma le tamā ia Tauapa'i ma le fanau sa nonofo latalata i le falesa, ae na sifi le aiga i se pitonuu mamao ese ma taumamao ai latou ma le lotu.

O le mea fo'i lea e fai ai ma galo latou i le asiasiga a le manuaos a le latou aufaipese, ona o le tu mamao ese.

O Saumolia ma le tamā ia Tauapa'i sa auai i le aufaipese, a ua avea le taumamao ma ala ua le toe faigofie ai ona auai i mea e fai.

Ua lua tausaga sosoo e le'i toe oo mai se asiasiga a le manuaos, fai mai le ta'ita'ipese ua fai si mamao o latou, e toe fa'aopopo ai i luga le totogi o le pasi.

Ae e le uma le faatalitali pea o le tina ia Saumolia. "Se, o atu, o le 'a faatali lelei mai outou pe a tou o atu," o lana upu lea e fai i fafine o le aufaipese.

Na alu le faatau a le fafine ma lana tama, o falaoamata ma suka ma mea uma na e fai ai puligi. Ua fo'i mai ma gaoioi loa i le faiga, e lima puligi lapopo'a na tao e faatali ai le manuaos.

O le tamā ia Tauapa'i e fealua'i i taavale la'upasese, e masani ona faamatala i ana uo Samoa latou te galulue

le tulaga o le le asia o lona aiga e le manuaos a le latou aulotu.

Ua ta'u i ai e Pa'i o loo fai le tao puligi a lona to'alua e faatali ai le manuaos. A o ia e malaga i Samoa e asi lo latou aiga.

Na vela le umu puligi a le fafine ma lana fanau ona faamaalili lea ae fai le sosi e taumafa ai. Ua uma lea ona tunu lea o le koko Samoa. Ua mae'a, ona faamalu lea ma fai a latou teuga e faatali le taunuu mai o le manuaos.

Ta le 11, ta le 12, ae vaaia loa le aga'i mai o ni taavale laiti i luma tonu o lo latou lumafale. E fa taavale na tutu ma gasolo mai i fafo ni tagata e le atoa se sefulu. 'A o fea le pasi?' 'Ai ua pe i le auala!'

Ona amata loa lea o pesega o le Kerisimasi. Na ofo le fafine i le to'alaiti o tagata o le manuaos ae pei o se 'au faipese a agelu o loo pepese mai. Ua le uma lona fia faalogo.

Ae na iu ina faapea mai se leo mai le pogisa, "O le a tatou faai i le tatalo." Ua mae'a le tatalo ona toe faapea mai lea o le leo, 'Ia, Saumolia ma le aiga alii, o le mea sili ua tatou aulia manuia mai le aso fanau o le Mesia, a o le a fai le tonu, o le a fa'aauau le galuega ona e iai nai aiga ia e fia asia." E fai lava le tala a o loo ua gasolo sui o le manuaos i taavale.

Ua sasalu atu le lauga faafetai a le fafine ma talosaga e faatali mai, ua nati atu i lana fanau e faopusa puligi ma sii le ulo koko i taavale o loo tutu mai. Ua savali atu fo'i ma faatalofa i le ta'ita'i o le manuaos. Na te tau le iloa atu foliga, e pulolou i solo papa'e.

Ua avatu lana faafetai ma momono atu le teutusi e \$60, ia ma le pusa puligi ma ona teuteuga ua iai. E le'i leva ae faatofa mai le 'aumanuaos ma nimo atu loa i le vaai.

"E te iloa oe se mea malie, tina," o le tala lea a Sela. "E leai ma se teine na ou vaai i ai, na'o tamaloloa lava. A o leo e muliga leo o tama'ita'i."

"E sa'o oe, matua malie fo'i lea mea," o le tali lea a Saumolia. "E leai fo'i ma se isi o latou ou te iloa. Ai o le pogisa o le po"

Na momoe le aiga ae na faate'ia i le faalogo atu o loo pepese mai se isi manuaos i fafo.

"Poo ai lela manuaos?" o le musumusu lea a Sau i lana tama. "Talofa e, ua leai se puligi o totoe e ave ma latou."

Na mautala le tamā ia Tauapa'i i le manuaos ina ua fo'i mai i Samoa.

Na iloa ane o ana uo faigaluega e ana le fuafuaga faalilolilo lenei. O le isi manuaos, o le latou aufaipese lea ua fai si tuai mai.

"Fua lena o le faiga, ua le tofo i puligi a Sau," o le tala lea a le faife'au ma 'ata.

Fai atu la o le malie o leo o ave taavale," o le ofo lea a le fafine o Sau ina ua faamatala e lona to'alua le sa'o o le mea na tupu.

"O le DVD a Fagatogo lea na ta ma pepese mai ai. E to'alua Initia na iai."

"Matua ula tele. E sa'o a la'u faalogo, e sau ai ma le faa-Initia.

"Ae ana leai nei le manuaos sesē ta te le lagona le o'o mai o se Kerisimasi," o le ta'utinoga lea a le fafine ia Saumolia.

E lei toe tupu lava se mea faapea. Ae na aoga le mea na tupu ua le toe faatamala ai le ta'ita'ipese. Tele puligi ua maumau i le na'o le \$30 e faaopopo i le tau o le pasi. Ua to'aga fo'i le fafine o Saumolia e fai ana tapenaga i tausaga uma.

"Tatou o muamua i le fale o Sau ma Pa'i e mau ai puligi," o tala ia a le aufaipese. "O le lelei ia o aano o puligi," o tala faaviivii ia a isi.

"Faato'a leaga lava puligi pe a tutuli mai Initia e fai a tatou manuaos," o le faitio lea a le fafine o Sau."

MAI LE NUU MONI: MANUIA LE KERISIMASI



NUS: Pule Sili Tuifuisa'a Prof. Patila Aмоса ma le Sui Pule Sili Peseta Dr. Desmond Lee Hang ma nisi o alii ma tama'ita'i o le Laumua Le Papaigalagala, i lanu o le Vaitau Fiafia. Sa fai so latou sao i pesepesega o le Kerisimasi, o le a faasalalauina i luga o le NUS TV i se taimi lata mai. Ua lafo atu i le aumaimoa e filifili le sili i le fea a'oga e sola ma le mua i le leo malie. Tala moni, e le faigofie le filifiliga.

Auā ua fanau mai mo tatou le tama, ua foa'iina mo i tatou le atalii, e i lona ua le malo, e igoa foi ia o le Silisili Ese, o le Faipule, o le Atua Malosi, o le Tamā o le Faavavau, ma le Alii o le Filemu—Isaia 9 f.6.

For unto us a child is born, unto us a child is given; and the government shall be upon his shoulder; and his Name shall be called Wonderful, Counsellor, The Mighty God, The Everlasting Father, The Prince of Peace

MAI LE NUU MONI: MANUIA LE KERISIMASI



CSS: Luma: Galumalemana A Hunkin (SL), Monalisa Saveaalii Malietoa (HOD), Ta'iao Dr. Matavai (Director), Faamausili T Galuvao (L), Dr. Brian Alofaituli (SL), Levitaumalae Dr. PSL Tavita (SL).

Totonu: Angela Fatupaito, Dora Neru-Faafo, Loimata Poasa (L), Mohammed Sahib (L), Ta'atia Fagalele (L), Sanele Leota (L). Tula: Dr. Sam Aмоса (SL), Rev. Deacon Pua Ielome Ah Tong (L), Rev. Malotau Lafolafoga (L). E le o iai i le ata: Sa'u E Tauave (L), Dr. Masami Tsujita (SL), Aiga Schmidt, Gregory Jackmond, Dionne Fonoti

A o oe, Peteleema-Efarata, e itiliti oe i afe o Iuta, ae tupu mai ia te oe mo a'u o le na te fai ma faipule ia Isaraelu, o lona tupu mai talu mai anamua lea, talu mai ona po o le vavau lava—Mika 5 f.2.

Avea ia le agaga o perofetaga o le 'oli'oli ma le faamoemoe matou te ofo alofa atu ai i le amataga o le vaitau fiafia. Avatu fo'i le faamalo i fe'au ma tiute sa fitaituga ai, e le gata i Samoa nei a o le salafa o le kelope o loo nopi'a'i ai le mamalu o si o tatou atunuu. Tautai a'e i faatamasoaliiga o le 2023. Ia fo'i pea i le Tautai Sili lona viiga. O le tatalo, ia avatu lou tou soifua ma so matou ola i le aso fanau o le Pepe o le Kerisimasi. Manuia. Alofa'aga—Pulega a le OLA Puletini A'oga.

Faafetai tele

Ua tatou iai i luga o le gaga e pei o le upu e fai i faiva o le gataifale. Pe faapea fo'i, i lena agaga o le vaitau 'oli'oli, a o faatili foe mo le a'e i faatautaiga ma faatamasoaliiga o lena tausaga a'oga 2023.

O e sa seu i le moana ma ona fita, sa fai ma le talitonuga o loo talosia o latou faiva e le taliuta o loo tapua'i mai. E faapena fo'i le sa tauola ma faapea ona fetalia'i ai pea le li'osaga a le ola mo Samoa.

Pe tautua mai i nuu ese poo le nuu moni fo'i, ae tasi a le faafitiga, ia fa'aaoga pea i tatou e le Alii i tofiga ma tiute ua galulue ai. Mo fanau ua pine se ausiga i se tusipasi, e iloga le atu ē a matua ma aiga; pe ua maua fo'i se avanoa faigaluega, pe sauni e tu'ua le atunuu mo nisi avanoa tatala mai fafo, o ni pine taua uma nei e ao ona manatua. Sau se aso toe tepa i tua ma iloa le taua o na ausiga i lau malaga i le olaga.

E 19 ai i lena lomiga le aofa'i o a tatou OLA Faitau 2023. Amata mai i Aotearoa a tatou ripoti a'oga. O le taimi o suiga o'oo'o mo Aotearoa talu le Koviti-19, aafia ai le ta'otoga o mea e o'o lava i ana faigamalo. Sa feagai le malo ma lu'i iloga e iai le finau a faia'oga i o latou totogi. Iloga fo'i le omia o iunivesite ia latou faasoa tautupe, ma aafia ai le 'aufaigaluega. Ma le faama'i fou na tupu mai ai, o le tia'i a'oga. Ae fetāla'i faafitauli taua'oga o malo i le 2023, talu le Koviti.

O le puletini muamua lomiga i Samoa, o le 17, fetau ma le Fono o Measina Samoa, ma le OCIES. O ni ausiga ia mo lena tautua, ua mafai ai fo'i ona avanoa i faamatalaga ma tala o le Laumua Le Papaigalagala.

Avea lena avanoa e saga faafetaia ai le sao a pa'aga sa lagolagoina le OLA i Aotearoa, i Samoa nei, faafetai tele. Tatalo pea mo le fa'aaauaina o na sootaga lelei i le 2024.

E avatu fo'i malu i pu'ega i ni lape. Vaatele atu ia i ou tou finagalo malamalama. A ia manuteleina fuafuaga o le 'vaitau fiafia' i le agalelei o le Matai Sili. Manuia tele le Kerisimasi. Soifua ma ia manuia.

NIUPAC PUBLICATION

OLA PULETINI A'OGA

LPSL Tavita, PhD (1st Editor)

Itavita8@gmail.com

Muliagatele Vavao Fetui, PhD

v.fetui@auckland.ac.nz

Salā Saili Aukuso, PhD

saili.niupac@gmail.com

Email: ola-niupac@gmail.com

Phone: 02102567412

Facebook: [ola—pletini—a'oga](https://www.facebook.com/ola-pletini-a-oga)

Website: www.ola888.com

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA acknowledges and defends the rights of other copyright holders whose material we borrow and acknowledge accordingly.

NIUPAC 2011